

XEFATURA DO ESTADO

9703 *CORRECCIÓN de erros da Lei 27/2003, do 31 de xullo, reguladora da orde de protección das vítimas da violencia doméstica. («BOE» 126, do 25-5-2004.)*

Advertido erro na Lei 27/2003, do 31 de xullo, reguladora da orde de protección das vítimas da violencia doméstica, publicada no «Boletín Oficial del Estado», suplemento número 11 en lingua galega, do 1 de setembro de 2003, procédese a efectuar a oportuna rectificación:

Na páxina 1896, segunda columna, no artigo segundo, número 7, primeiro parágrafo, terceira liña, onde di: «...ou ben polo Ministerio Fiscal, cando existan fillos...», debe dicir: «...ou ben polo Ministerio Fiscal cando existan fillos...».

MINISTERIO DE ECONOMÍA E FACENDA

10000 *ORDE EHA/1517/2004, do 25 de maio, pola que se reducen para o período impositivo 2003 os índices de rendemento neto aplicables no réxime de estimación obxectiva do imposto sobre a renda das persoas físicas para as actividades agrícolas e gandeiras afectadas por diversas circunstancias excepcionais. («BOE» 130, do 29-5-2004.)*

O artigo 35.4.1 do Regulamento do imposto sobre a renda das persoas físicas, aprobado polo Real decreto 214/1999, do 5 de febreiro, establece que cando o desenvolvemento de actividades económicas ás cales fose de aplicación o réxime de estimación obxectiva, se vise alterado por incendios, inundacións ou outras circunstancias excepcionais que afectasen un sector ou zona determinada, o ministro de Economía e Facenda poderá autorizar, con carácter excepcional, a redución dos signos, índices ou módulos.

A este respecto, o Ministerio de Agricultura, Pesca e Alimentación emitiu informe polo que se pon de manifesto que durante 2003 se produciron circunstancias excepcionais no desenvolvemento das actividades agrícolas e gandeiras, as cales se localizan en determinadas zonas xeográficas, que aconsellan facer uso da autorización contida no citado artigo 35.4.1 do Regulamento do imposto sobre a renda das persoas físicas.

Estas circunstancias son as seguintes:

Inundacións acaecidas nos meses de febreiro e maio nas bacías dos ríos Ebro e Douro.

A seca que afectou os pastos de montaña e as producións forraxeiras na cornixa cantábrica.

Medidas excepcionais de prevención sanitaria e epidemiolóxica nas explotacións de bovino de cría nalgunhas áreas do norte de Extremadura.

Altas temperaturas e seca en determinadas explotacións de cereal.

Enfermidades víricas que afectaron o cultivo dalgunhas hortalizas.

Inundacións e tormenta de sarabia acaecidas en Alcañiz no mes de agosto.

Por razóns dunha maior claridade para aplicar estas medidas optouse por aprobar as reducións nun único anexo, no cal se agrupan as reducións por comunidades autónomas, provincias, ámbitos territoriais e actividades.

Na súa virtude, este ministerio dispuxo:

Primeiro. Redución dos índices de rendemento neto aplicables ás actividades agrícolas e gandeiras afectadas por circunstancias excepcionais.—Os índices de rendemento neto aplicables en 2003 ás actividades agrícolas e gandeiras desenvolvidas nos ámbitos territoriais definidos no anexo desta orde serán os contidos nel.

Segundo. Regularización por contribuíntes afectados.—Os contribuíntes afectados pola redución de índices de rendemento neto aprobada nesta orde que presentasen a súa declaración do imposto sobre a renda das persoas físicas correspondente a 2003 poderán regularizar a súa situación presentando solicitude de rectificación da súa autoliquidación ante o delegado ou administrador da Axencia Estatal de Administración Tributaria competente por razón do domicilio fiscal do contribuínte, nos termos previstos na disposición adicional terceira do Real decreto 1163/1990, do 21 de setembro, polo cal se regula o procedemento para a realización de devolucións de ingresos indebidos de natureza tributaria.

Estas solicitudes de rectificación poderanse presentar a partir da entrada en vigor desta orde.

Disposición derradeira única.

Esta orde entrará en vigor o día da súa publicación no «Boletín Oficial del Estado».

O que lle comunico a V.E. e VV.II. para o seu coñecemento e efectos.

Madrid, 25 de maio de 2004.

SOLBES MIRA

Excmo. Sr. Secretario de Estado de Facenda e Orzamentos e Ilmos. Sres. Secretario xeral de Facenda, Director xeral da Axencia Estatal de Administración Tributaria e Director xeral de Tributos.